

Verklagsreglur um læknisrannsókn á fólki sem flyst til landsins.

Gilda frá september 2015

1. Með umsækjendum um dvalarleyfi er í þessum verklagsreglum átt við þá sem sækja um dvalarleyfi eða hæli sem og flóttamenn, sbr. lög um útlendinga nr. 96/2002.
2. Umsækjendur um dvalarleyfi frá Mið- og Suður-Ameríku, þ.m.t Mexíkó, Evrópu utan Evrópska efnahagssvæðisins (EES), Asíu eða Afríku skulu gangast undir læknisrannsókn vegna sóttnæmra sjúkdóma. Hafi umsækjandi fullgilt erlent læknisvottorð að mati læknis, sbr. 3. lið, og sé það ekki eldra en þriggja mánaða, þarf viðkomandi ekki að gangast undir læknisrannsókn. Umsækjendur frá EES, Sviss, Bandaríkjunum, Kanada, Ástralíu, Nýja Sjálandi eða Ísrael þurfa ekki að gangast undir læknisrannsókn.
3. Læknar á Íslandi með lækningaleyfi geta framkvæmt læknisrannsókn samkvæmt þessum verklagsreglum. Þegar læknisrannsókn er lokið skulu læknar senda Útlendingastofnun staðfestingu á því að fullnægjandi læknisrannsókn hafi verið gerð.
4. Með læknisrannsókn er átt við:
 - a. Almenna læknisskoðun sem gefur vísbendingu um heilsufarsástand þess sem sækir um dvalarleyfi. Kanna skal hvaða bólusetningar umsækjandi hefur fengið. Sé bólusetningum ábótavant skal tryggja að viðkomandi sé boðin bólusetning í samræmi við leiðbeiningar um almennar bólusetningar hér á landi. Ef tilkynningarskyldur sjúkdómur greinist, sbr. reglugerð um skýrslugerð vegna sóttvarna nr. 221/2012 er mælst til að samráð um meðferð og eftirlit verði haft við göngudeildir sem sinna slíkum sjúkdómum sbr. 1. gr. reglugerðar um sóttvarnaráðstafanir nr. 817/2012.
 - b. Berklarannsókn: Berklahúðpróf skal gera hjá þeim sem eru 35 ára og yngri. Bendi húðpróf til berklasmits skal taka röntgenmynd af lungum. Einungis röntgenmynd skal tekin af þeim sem eru eldri en 35 ára. Ef fólk hyggst dvelja skemur en eitt ár má takmarka berklaskoðun allra við röntgenmynd af lungum (sbr. lið 8).
 - c. Rannsókn vegna þarasmits: Saurrannsókn (ræktun og smásjárskoðun) skal gera hjá þeim sem hafa einkenni eða hafa haft einkenni frá meltingarvegi. Leita skal að þarmasmiti sem er tilkynningarskylt (*salmonella*, *sígella*, *kampýlóbakter* og *Giardia lamblia*). Slíka leit skal gera hjá öllum börnum yngri en sex ára án tillits til einkenna.
 - d. Rannsókn vegna lifrabólgu B: Leita skal að lifrabólgu B nema ef viðkomandi hyggst dvelja skemur en eitt ár hér á landi (sbr. lið 8).
 - e. HIV: Gera skal HIV próf nema ef viðkomandi hyggst dvelja skemur en eitt ár hér á landi (sbr. lið 8).
 - f. Kynsjúkdómar: Rannsaka ber þá sem hafa einkenni um kynsjúkdóm eða ef rökstuddur grunur um kynsjúkdóm vaknar. Gera skal sárasóttarpróf hjá öllum með mótefnamælingu nema ef viðkomandi hyggst dvelja skemur en eitt ár hér á landi (sbr. lið 8).

5. Læknisrannsókn getur einnig tekið til annarra heilsufarsþátta sem ógna heilsu manna á hverju því landsvæði sem komið er frá. Frekari rannsóknir skulu þá gerðar samkvæmt ákvörðun sóttvarnalæknis.
6. Læknisskoðun og aðrar rannsóknir samkvæmt verklagsreglum þessum skulu framkvæmdar í einni og sömu heimsókn svo fremi að því verði við komið.
7. Við upphaf skólagöngu barna sem verklagsreglur þessar taka til skal ganga úr skugga um hvort gerð hafi verið læknisrannsókn skv. þessum verklagsreglum.

Ef læknisrannsókn með berklahúðprófi er gerð utan Reykjavíkursvæðisins skal hafa samráð um framkvæmdina við göngudeild sem sinnir tilkynningarskyldum sjúkdómum.

8. Umsækjendur um dvalar- og atvinnuleyfi, námsdvöl eða vistráðningu lengur en 3 mánuði en skemur en eitt ár og eru frá löndum sem tilgreind eru í lið 2 skulu gangast undir eftirfarandi læknisrannsókn:
 - a. Almenn læknisskoðun.
 - b. Berklarannsókn sem felur í sér röntgenmynd af lungum.
 - c. Rannsókn á öðrum tilkynningarskyldum sjúkdómum skal einungis gera ef almenn læknisskoðun gefur grun um þá sjúkdóma.
9. Greiðsla vegna læknisrannsókna sem gerðar eru vegna umsóknar um dvalar- og atvinnuleyfi og eru í samræmi við verklagsreglur þessar skulu greiðast af vinnuveitanda eða þeim sem sækir um dvalar- eða atvinnuleyfi. Leiði læknisrannsókn í ljós þörf fyrir frekari sértækar rannsóknir þá greiðir umsækjandi eða sjúkratrygging hans kostnað við þau heilsufarslegu vandamál sem greinast fyrstu sex mánuðina sem dvalið er í landinu. Læknisrannsókn sem vinnuveitandi óskar sérstaklega eftir greiðist af vinnuveitandanum.
Greiðslur vegna læknisrannsókna sem gerðar eru á hælisleitendum og flóttamönnum skulu vera þessum einstaklingum að kostnaðarlausu sem og kostnaður vegna bóluefna sem falla undir almennar bólusetningar á Íslandi.
10. Verklagsreglur þessar eru settar á grundvelli sóttvarnalaga nr. 19/1997 sbr. einnig reglugerð um sóttvararáðstafanir nr. 817/2012 og taka við að eldri verklagsreglum frá 5. september 2012.

Reykjavík, 16.9.2015

Sóttvarnalæknir